

## EZETZA

«Ez, ez» diño umeak,  
ixillaren erdian.

—Zer emon dautsazu,  
ama, ume txikiak  
ixillaren erdian  
ezezka jarduteko?

«Ez dot izan nai  
aitaren antzeko».

—Zer ikusi dau, ama,  
umetxo toles-bakoak.

bere aitaren kideko

ez dauala izan nai

orren setati esateko?

«Ez, ez dot artu nai  
zuk emondako saria».

—Zer emon dautsazu,  
ama, zeure umeari,  
ez dauala zuk emonik  
artu nai autortzeko?

«Ez, ez» orreik oloka dagoz  
ixillaren miesa gorrian.

Utsik daukaz eskuak

eta ez ditu bete nai.

«Ez» diño gauak, «ez» egunak.

—Zer dau zure semeak, ama,  
orren tematsu ukatzeko?

Gau baltzaren erraian

danban ikusi dau aita,

amari zital ziñuka,

zantar biraoka...

«Ez, ez dot nai —diño umeak—  
aitaren antzeko izan».

*Igotz*